

# Powšitkowne WOZJEWJENJA

njedźelu, 28. junija 2015

## Duchowna hudźba

Twórby Heinricha Schütza a Johanna Sebastiana Bacha zaklinča tutu njedźelu, 28. junija, we 18.00 hodź. w rjedže „Duchowna hudźba“ w Budyskej cyrkwi Našeje lubeje knjenje. Kathleen Danke (sopran), Gotthold Schwarz (bas) Hartmut Becker (violoncello) a Michaela Hassel (pišćece) hudźbny nyšpor wuhotuja. Zastup je darmotny.

## Zetkanje Częstochowskich putnikow

Tež lětsa pozbudža farar Beno Jakubaš, so w serbskej skupinje na putnikowanje z Warszawy do Częstochowy podač. Hić smě kóždy sobu, kotryž je 18. žiwjenske lěto docpěl. Termin putnikowanja je wot 5. do 15. awgusta. Zajimcy njech so hač do njedźele, 28. junija, pola fararja Bena Jakubaša w Njebjelčicach přizjewja, telefonowe čisło (0 35 78) 30 20 05. Zetkanje wšitkich putnikow budže wutoru, 30. junija, w 19.30 hodź. w Njebjelčicach na farje.

## Božej mši na Marije wopytanja w Róžeńce

Dopołniša Boža mša na swjedženju swjateje Marije wopytanja štwórtk, 2. julija, w Róžeńce budže w 9 hodź. Swjatočne putniske kemše budu potom wječor w 19 hodź.

## Póslanje wosadneju referentkow

Weronika Wróblowa a Lenka Peregrinová dóstanjetej sobotu, 4. julija, na Božej mši we 18 hodź. w Drježdžanskej katedrali póslanje jako wosadneju referentce, na čož su wšitcy přeprošeni. Po wjacelětnym wukubłanju přiwozmje jeju arcybiskop Heiner Koch swjatočnje do słužby Drježdžansko-Mišnjanskeho biskopstwa. Džěl swojeho wukubłanja je Serbowka Weronika Wróblowa w Chróšćanskej a Budyskej wosadze, ze Słowakskeje pochadźaca Lenka Peregrinová w Drježdžanach absolwowała. Do toho bě Weronika Wróblowa referentka w młodźinskim dekanatnym dušepastyrstwe we Worklecach. Božej mši z póslanjom přizamknje so zetkanje w Domje katedrale.

## 2. Alojsowy festival w Radworju

Wjele hosći wočakuja spočatk julija w Radworju. Z młodźinskim festivalom wot pjatka do njedźele, 3. do 5. julija, woswjeća tam narodniny zbóžneho Alojsa Andrickeho. Hłowny organizator je nimo Radworskeje wosady franciskanski pater Paulus Maria Tautz. Wón je tež loňši 1. Alojsowy festival sobu přewjedł.

Tak poskići so na přnim dnju wot 19 hodź. koncert z rockowymi skupinami z Jendźelskeje, Nižozemskeje, USA a Němskeje. Mjez druhim wustupi na tutym wječoru Edwin Fawcett ze svojim gospelowym chórom. Tež hiphopowa hudźba Dannyja Fresha zaklinči. Loňši tajki koncert je młodych kaž staršich jara zahorił.

Workshopy wočakuja młodostnych sobotu, 4. julija. Planowane su na přikład workshopy k temam gregorianika, foto, widejo abo zetkanje ze skupinu „YouCat-Cats“. Popołdnu wot 14 hodź. móža młodostni pak kopańcu hrać, w Starej cyrkwičce so modlić abo kabaretištej Peterej Flache připosłuchać. Po Božej mši we 18 hodź. scěhuje „nightfever“.

Njedźelu, 5. julija, budže Boža mša w 9.30 hodź. Kemšam přizamknje so wosadny swjedzeń wokolo cyrkwe. Wšitcy – nic jenož młodostni – su wutrobnje do Radworja přeprošeni.

## **Eksercicije w Drježdžanskim Domje Wysoke duby**

Dny rozpominanja a modlenja wotměja so wot pjatka, 30. oktobra, we 18 hodź. hač do njedźele, 1. nowembra, w 10 hodź. w eksercicijnym Domje Wysoke duby w Drježdžanach. Jezuitski pater Willi Lambert je k temje „Z wutroby žiwy być – Haj k Lětu smilnosće“ přewjedže. Wón budže w němskej rěči přednošować, modlitwy a kěrluše budu serbske. Dny rozpominanja maja wěriwym pomhać, z duchownymi impulsami, wosobinskim modlenjom, rozmołwu a Božej mšu žro Jězusoweho ewangelija spóznać. Přizjewić měli so zajimcy w Chróscicach na farje, telefonowe čisło (03 57 96) 8 04 00, w Haus HohenEichen, Dresdnerstr. 73, 01326 Dresden, telefonowe čisło (03 51) 2 61 64 10. abo z mailku na info@haus-hoheneichen.de.

## **Z busom do Fatimy**

Štóž rady z lětađlom njeleći, ma skladnosć, sej da-li Bóh klětu z busom do Fatimy doječ. Jězbu planujemy za srjedź awgusta. Hłowny cil je wězo Fatima, ale wopytamy tež Santiago de Compostela a Avilu. Dokelž je za tajku jězbu něhdže dwanaće dnjow trěbnych, budže wona wězo něšto wjace hač tysac eurow płaćić. K lepšemu planowanju prošu, zo bychu so zajimcy, kiž njejsu so hišće přizjewili, pola mje pod telefonowym čislom (03 59 35) 2 04 25 přizjewili. Tute přizjewjenje hišće njeje zwjazowace, ale woznamjenja tola kruty wotpohlad, wšako móhło so za tutón poměrnje dołhi čas wjele změnić. *T. Kubašec*

## **Putniska jězba do Mariazella**

Mariazell w Awstriskej je hłowny cil putniskeje jězby. Nimo toho chcemy wulkotny benediktinski klóšter Melk, Narodny park Gesäuse a klóšter Admont wopytać. Předwidzane je tohorunja, zo wobhladamy sej z łódže luboznu krajinu Wachau. Přenocujemy stajnje w Mariazellu. Jězba wotměje so wot póndźele do soboty, 12. do 17. oktobra. Přizjewić móža so zajimcy pola Šmitec w Radworju, telefonowe čisło (03 59 35) 28 60.

## **Putniska jězba do Santiaga de Compostela a Fatimy**

Za putnisku jězbu z lětađlom wot pjatka hač do pjatka, 11. do 18. septembra, do Santiaga de Compostela a Fatimy su hišće někotre městna swobodne. Přizjewić móža so zajimcy hač do wutory, 30. junija, pod telefonowymaj čislomaj (01 63) 7 33 82 05 a (03 57 96) 9 54 28 (po 19 hodź.) abo pola mje w Hórkach, Sydlišćowy puć 2. *Maćij Hadank*